

06/03/2003

Musa tentukan sendiri pasukan dalam Kabinet Sabah

Lichong Angkui; Mohd Azrone Sarabatin

KOTA KINABALU: Ketua Menteri, Datuk Chong Kah Kiat menyerahkan kepada Datuk Musa Aman sama ada mahu melakukan rombakan barisan Kabinet negeri selepas peralihan kuasa pada 27 Mac ini.

"Beliau akan menentukan pasukan (dalam Kabinet), terutama dalam menghadapi pilihan raya umum dan negeri akan datang," katanya menjawab soalan pemberita selepas mempengerusikan mesyuarat mingguan Kabinet negeri di Wisma Innoprise, di sini semalam.

Chong ditanya kemungkinan ada rombakan Kabinet negeri berikutan pelantikan Musa sebagai Ketua Menteri baru.

Katanya, pengumuman mengenai pelantikan Musa menamatkan spekulasi selain 'menghentikan aspirasi' pemimpin tertentu mengambil alih kepemimpinan negeri.

"Yang penting sekarang kita sudah tentukan pengganti saya...soal keanggotaan dalam Kabinet bukan masalah dalam Barisan Nasional (BN) sejak dulu hingga sekarang.

"Maka apabila beliau mengambil alih kepemimpinan pada 27 Mac ini terserah kepadanya menentukan team (pasukan) sendiri," katanya.

Ditanya adakah susunan Kabinet sekarang baik, Chong menjawab: "Kita mempunyai beberapa pemimpin yang sangat baik tanpa menghurai lebih lanjut."

Beliau yang juga Pengerusi BN Sabah sehubungan itu berharap semua parti komponen BN negeri memberikan sokongan padu kepada Musa bagi membolehkannya melaksanakan tugas dengan berkesan.

Mengenai kedudukannya selepas berundur sebagai Ketua Menteri, Chong berkata, beliau sentiasa bersedia berkhidmat sama ada dalam Kabinet atau di luar kepemimpinan kerajaan.

Musa, 52, yang juga Menteri Kewangan dinamakan oleh Datuk Seri Dr Mahathir Mohamad untuk menjadi Ketua Menteri Sabah selepas tempoh perkhidmatan Chong tamat pada 27 Mac ini.

Buat sementara waktu, Musa akan memangku jawatan Ketua Menteri berikutan Chong mengambil cuti mulai semalam.

Dalam pada itu, ketibaan Musa di Lapangan Terbang Antarabangsa Kota Kinabalu (LTAKK) dari Kuala Lumpur kira-kira jam 12.15 pagi semalam disambut kira-kira 200 penyokong Umno dan BN.

Dalam sidang akhbar ringkasnya, Musa sekali lagi berterima kasih kepada Perdana Menteri yang memberi kepercayaan kepadanya memegang jawatan itu.

Beliau berjanji menunaikan tugas dan amanah sebaik mungkin, sambil berharap mendapat sokongan dan kerjasama pemimpin BN negeri.

Sehubungan itu, katanya, beliau akan meneruskan perancangan serta agenda pembangunan yang dirancang oleh Chong dan tidak merancang sebarang perubahan drastik buat sementara waktu.